

राष्ट्रपति-खनन कंपनियां

राष्ट्रपति रामनाथ कोविंद ह खनन कंपनी मन ले श्रमिक अउ उंखर परिवार वाला मनके कल्याण बर नीति बनाय बर किहीन हे। आज नई दिल्ली म खनन क्षेत्र ले जुड़े दू हजार तेरा अउ दू हजार चौदह के राष्ट्रीय सुरक्षा पुरस्कार देवत श्री कोविंद ह खनन कंपनी मन ले खान मन म दुर्घटना रोके बर विश्व स्तर के सुरक्षा प्रणाली ल अपनाय बर किहीन। ओमन किहीन कि ए बात के धियान राखे जाना चाही कि खोदाई के सेती पर्यावरण ल नकसान इन पहुंचय।

घुटना प्रतिरोपण ऑपरेशन

केन्द्र सरकार ह आने-आने घुटना प्रतिरोपण ऑपरेशन के उच्चतम लागत तय कर दे हावय। बड़े पैमाना म उपयोग म लाए जाने वाला कोबाल्ट क्रोमियम घुटना प्रतिरोपण के लागत करीबन पचपन हजार रूपिया राखे गे हावय, फेर अभी एखर औसत लागत एक लाख अंठावन हजार रूपिया ले जादा आथे। केन्द्रीय रसायन अउ उर्वरक मंत्री अनंत कुमार ह किहीन कि सरकार के ए फइसला ले डेढ़ से दू करोड़ लोगन ल फायदा मिलही।

रायपुर गोइंग पिंक

कैसर बर माईलोगिन मन ल जागरूक करे बर रईपुर म प्रसिद्ध मॉडल मिलिंद सोमन के संग माईलोगिन अउ युवा मन आज बिहनिया दउड़ म सामिल होईन। ए दउड़ मरीन ड्राईव ले घड़ी चउक तक राखे गे रिहीस। ए संबंध म रईपुर गोइंग पिंक डहार ले बारा नवंबर के नया रईपुर के केन्द्रीय उद्यान म एक ठिन कारीकरम घलो आयोजित करे जाही।

सखी वन स्टॉप सेंटर

राज्य के सबो सत्ताईस जिला मन म चलत संखी वन स्टाप सेंटर के सेवा देवइया मन बर रईपुर म राखे गे दू दिन के परसिक्षण कारीकरम के आज समापन होईस। कारीकरम म महिला अउ बाल विकास विभाग के सचिव डॉक्टर एम. गीता ह सखी सेंटर रईपुर के टीम ल अभी तक दू हजार प्रकरण हल करे म बधई दीन। ओमन ह जशपुर जिला म माईलोगिन मनके समस्या के निपटारा बर 'बेटी जिन्दाबाद' नाव के कारीकरम चलाय म सखी सेंटर जशपुर के बड़ई करीन। परसिक्षण म हिंसा ले पीड़ित माईलोगिन मन बर कानूनी सुरक्षा के उपाय के बारे म घलो बताय गीस।

बेमेतरा-कांग्रेस प्रदर्शन

बेमेतरा जिला के बेरला म अनाचार पीड़िता के कथित रूप ले लापता होय के घटना के सेती कांग्रेस ह आज उहां पुलिस के खिलाफ प्रदर्शन करीस। एमा प्रदेस कांग्रेस अध्यक्ष भूपेश बघेल के अलावा ताम्रध्वज साहू, रविन्द्र चौबे, मोहम्मद अकबर, छाया वर्मा जइसन बड़े नेता मन सामिल होईन। कांग्रेस ह ए मामला म न्यायिक जांच कराय के मांग करत हे।

खबर के मुताबिक बेरला थाना के बरगांव म होय सामुहिक दुष्कर्म के आरोपी मनके खिलाफ कड़ा कार्रवाई के मांग ल लेके काली कांग्रेसी मन ह एसडीएम कार्यालय के घेराव करे के परयास करे रिहीन। इही दउरान ग्रामीण मन ह पुलिस उपर पथराव कर दीन, जेमा एसपी अउ टीआई संघरा दर्जन भर पुलिसकर्मी मन घायल होगे रिहीन।

आरिफ शेख-सामुदायिक पुलिसिंग अवार्ड

प्रदेस के आईपीएस अधिकारी आरिफ शेख ल सरलग दूसर घांव सामुदायिक पुलिसिंग के ऑस्कर कहे जाना वाला आई.ए.सी.पी. अवार्ड दे जाही। अमेरिका के फिलाडेल्फिया म चोबीस अक्टूबर के ओमन ल ए अवार्ड दे जाही। आकाशवाणी समाचार ले गोठबात करत बस्तर पुलिस अधीक्षक आरिफ शेख ह बतईन कि बस्तर पुलिस ह घोर नक्सल परभावित इलाका मन म लोगन के बीच विश्वास जगाए बर 'आमचो बस्तर-आमचो पुलिस' अभियान के सुधर सुरुवात करे हे।

ब्लैक कैट कमांडो-प्रशिक्षण

बड़े-बड़े आतंकवादी मन ले निपटे बर अउ महत्वपूर्ण मनखे मनके सुरक्षा म मुस्तैद राष्ट्रीय सुरक्षा गार्ड-एनएसजी के ब्लैक कैट कमांडो मन ह कांकेर के जंगल वॉर कालेज म परसिक्षण लेवत हे। ब्रिगेडियर बी.के. पोनवार के मुताबिक जंगल म आतंकवादी मन ले लड़े बर अउ जंगल म फंसे वीवीआईपी के सुरक्षा के कला ल सीखे बर एनएसजी के अठारा झिन सदस्य वाले दल ह कांकेर म पच्चीस दिन के परसिक्षण लेवत हे।

खेल-पुरस्कार

छत्तीसगढ़ सासन ह बछर दू हजार सोला-सतरा के राज्य खेल पुरस्कार बर अंतरिम सूची जार कर देहे। मुख्यमंत्री ट्रॉफी बर महिला सीनियर हैण्डबॉल टीम ल चुने गेहे। ए पुरस्कार के संबंध म दावा-आपत्ति के बाद अंतिम बड़ठका तेईस अगस्त के होही।

ओलंपिक हॉकी खिलाड़ी रेणुका यादव, तैराक सृष्टि नाग, बास्केटबॉल खिलाड़ी संगीता कौर, पैरालम्पिक एथलीट संगीता मसीह अउ श्रवण बाधित क्रिकेटर पृथ्वीराज रामटेके ल सहीद राजीव पांडेय पुरस्कार बर अंतरिम सूची म सामिल करे गेहे। उहें, शहीद कौशल यादव पुरस्कार बर तीरंदाज केलिमत लेप्चा, बॉस्केटबॉल खिलाड़ी गुलाबशा अली, बैडमिंटन खिलाड़ी आकर्षी कश्यप, कराटेबाज मिहिका तालुकदार, पैरालम्पिक तैराक अंजना बाई के नाव के अंतरिम घोसना करे गे हावय।

उहें, वीर हनुमान सिंह पुरस्कार बर घोसित नाव म कराटे कोच अमलेन्दु तालुकदार के नाव सामिल हावय।

शहीद विनोद चौबे सम्मान बर घोसित नाव म मास्टर एथलीट बालमुकुंद सिंह, हैण्डबॉल खिलाड़ी हेमंत कुमार साहू, टेबल टेनिस म पंकज कुमार सतपथी अउ अतर्राष्ट्रीय खेल समालोचक जसवंत क्लॉडियस सामिल हावय।

बैडमिंटन

पुणे म चलत अखिल भारतीय सीनियर रैंकिंग बैडमिंटन टूर्नामेंट के पहिली राउंड म छत्तीसगढ़ के आकर्षी कश्यप, दीक्षा चौधरी अउ दीपाली गुप्ता ह अपन-अपन एकल मुकाबला ल जीत ले हावय। फेर पुरुष वरग म छत्तीसगढ़ के खिलाड़ी मन ल आज निरासा हाथ लगीस। श्रेयांश जायसवाल ह अपन प्रतिद्वंदी यश योगी ल वॉकओवर दे दीन। उहें, सिद्धार्थ प्रताप सिंह ह दूसर वरीयता प्राप्त प्रतुल जोशी ले हार गीन।